

Na osnovu člana 14. Zakona o udruženjima i fondacijama ("Službene novine Federacije BiH", broj 45/02) Osnivačka skupština Udruženja matematičara Kantona Sarajevo na sjednici održanoj u Sarajevu dana 14.01.2016. godine, donosi:

## **STATUT UDRUŽENJA MATEMATIČARA KANTONA SARAJEVO**

### **I – OPĆE ODREDBE**

#### **Član 1.**

Udruženje matematičara Kantona Sarajevo (u daljem tekstu Udruženje) je nevladino, neprofitno, dobrovoljno, vanstranačko udruženje građana zainteresiranih za unapređivanje svih aspekata matematičkih nauka i njihovih primjena u Kantonu Sarajevo, osnovano Odlukom broj: 01/16 i u skladu sa Zakona o udruženjima i fondacijama ("Službene novine Federacije BiH", broj 45/02) (u daljem tekstu Zakon).

#### **Član 2.**

Ovim Statutom se, u skladu sa Zakonom, uređuje:

- Naziv udruženja, skraćeni naziv i sjedište Udruženja;
- Ciljevi, odnosno djelatnost Udruženja;
- Uvjeti i način učlanjivanja u Udruženje, prava, dužnosti i odgovornosti članova Udruženja i prestanak članstva;
- Organizacija Udruženja (organi i organizacione jedinice, način izbora organa, uvjeti i način opoziva, trajanje mandata, način odlučivanja i odgovornosti);
- Zastupanje i predstavljanje Udruženja;
- Kadrovska politika;
- Javnost rada Udruženja;
- Administrativni i stručni rad;
- Obrazovanje i osposobljavanje članova Udruženja;
- Oblik i sadržaj pečata Udruženja;
- Način sticanja, korištenja i raspolaganja sredstvima Udruženja i nadzor nad korištenjem tih sredstava;
- Postupak za izmjenu i dopunu Statuta, ovlaštenja i način donošenja drugih općih akata;
- Uvjeti i postupak za pripajanje, razdvajanje, transformaciju ili prestanak rada udruženja;
- Postupak za raspolaganje imovinom i drugim sredstvima u slučaju raspuštanja ili prestanka rada Udruženja;
- Druga pitanja od značaja za organizaciju i djelovanje Udruženja;
- Prelazne i završne odredbe;

### **II - NAZIV I SJEDIŠTE UDRUŽENJA**

#### **Član 3.**

Puni naziv Udruženja :

- na bosanskom jeziku glasi: **Udruženje matematičara Kantona Sarajevo**
- na hrvatskom jeziku glasi: **Udruga matematičara Kantona Sarajevo**
- na srpskom jeziku glasi: **Удружење математичара Кантиона Сарајево**

Skraćeni naziv Udruženja:

- na bosanskom jeziku glasi: **UM KS**
- na hrvatskom jeziku glasi: **UM KS**
- na srpskom jeziku glasi: **YM KC**

Službeni naziv Udruženja će se pisati latiničnim pismom.

Sjedište Udruženja je: Zmaja od Bosne 33-35, 71 000 Sarajevo, Bosna i Hercegovina.

Udruženje djeluje na cijelom području Kantona Sarajevo.

### **III – ZNAK I PEČAT UDRUŽENJA**

#### **Član 4.**

Udruženje ima svoj znak. Znak Udruženja je okruglog oblika. Puni naziv Udruženja na bosanskom jeziku, latinicom, ispisan je kružno uz rub znaka sa dodatnih devet tačaka koje simboliziraju 9 općina Kantona Sarajevo. U sredini znaka je stilski ispisan slovo M.

Udruženje ima veliki pečat okruglog oblika, promjera 50 mm i mali pečat, okruglog oblika, promjera 30 mm. Kružno uz rub pečata ispisan je Udruženje matematičara Kantona Sarajevo sa sjedištem u Sarajevo sa dodatnih devet tačaka koje simboliziraju 9 općina Kantona Sarajevo. U sredini pečata je je stilski ispisan slovo M.

Mali pečat je isključivo namijenjen za ovjeru virmana i druge finansijske te blagajničke dokumentacije.

### **IV - CILJEVI, ODNOSNO DJELATNOSTI UDRUŽENJA**

#### **Član 5.**

Ciljevi, odnosno djelatnosti Udruženja su:

- širenje i unapređivanje svih matematičkih disciplina i njihovih primjena u Kantonu Sarajevo,
- unapređivanje nastave matematike na svim nivoima obrazovanja,
- podizanje nivoa stručnih i naučnih znanja članova Udruženja organiziranjem matematičkih konferencija domaćeg i međunarodnog karaktera, stručnih i naučnih predavanja, seminara, savjetovanja, simpozija i razgovora,
- otkrivanje, podsticanje i pomaganje razvoja talenata za matematiku iz reda učenika osnovnih i srednjih škola, te studenata na visokoškolskim ustanovama,
- popularizacija matematičkih nauka i njihove uloge i mjesta u ukupnom društvenom razvoju,
- pripremanje učenika i studenata za takmičenja na svim nivoima,
- organiziranje takmičenja i sudjelovanje u takmičenjima učenika i studenata na svim nivoima,
- izrada elaborata i projekata iz naprijed navedenih oblasti
- štampanje časopisa, udžbenika, priručnika i drugih publikacija iz domena djelovanja Udruženja,

- saradnja sa odgovarajućim organima i sličnim organizacijama u zemlji i inostranstvu radi razmjene informacija i iskustava, organiziranja aktivnosti i poduzimanja mjera kojim se unapređuju matematičke nauke, afirmira njihova uloga i značaj,
- provođenje svih drugih aktivnosti koje bude nametala tekuća praksa,
- saradnja sa Univerzitetom u Sarajevu, njegovim stalnim i pridruženim članicama, kao i sa drugim visokoškolskim ustanovama u i izvan Kantona Sarajevo,
- saradnja sa Ministarstvima obrazovanja svih nivoa vlasti.

#### **Član 6.**

Utvrđene ciljeve Udruženje ostvaruje na način određen zakonom, ovim Statutom i drugim općim aktima.

### **IV - ČLANSTVO**

#### **Član 7.**

Članstvo u Udruženju je individualno, kolektivno i počasno.

Individualni članovi mogu biti svi matematičari Kantona Sarajevo, Bosne i Hercegovine i šire, a to su doktori matematičkih nauka, magistri matematičkih nauka, nastavnici i saradnici koji realiziraju neke matematičke discipline na univerzitetima Bosne i Hercegovine i šire, profesori matematike u srednjim školama, nastavnici matematike i fizike u osnovnim školama, lica koja su završila I i/ili II stepen studija matematike, kao i studenti matematike i svi ostali građani Bosne i Hercegovine i šire koji prihvataju ciljeve i Statut Udruženja i brinu za njihovo ostvarivanje, bez obzira na boju kože, jezik, vjeru, pol, političko i drugo opredjeljenje, članstvo ili nečlanstvo u nekoj političkoj stranci.

Kolektivni članovi mogu biti fakulteti, škole, preduzeća, udruženja, kao i sve institucije, odnosno organizacije koje imaju interes da ostvaruju saradnju sa Udruženjem.

Počasni član Udruženja može biti svako fizičko i pravno lice koje značajno doprinosi širenju i unapređivanju matematike i njenih primjena u Bosni i Hercegovini i šire.

#### **Član 8.**

Članstvo u Udruženju je dobrovoljno.

Članom Udruženja postaju lica koja prihvate ciljeve i Statut Udruženja i potpišu pristupnicu.

Osnivači stiču svojstvo člana Udruženja danom registracije Udruženja.

Pravna lica iz Člana 7. stav 3. ovog Statuta stiču svojstvo člana Udruženja na osnovu zahtjeva za prijem u članstvo i izjave o prihvatanju ciljeva i Statuta Udruženja.

Skupština Udruženja, na prijedlog Upravnog Odbora, donosi odluku o imenovanju počasnih članova Udruženja.

### **Član 9.**

Članovi Udruženja imaju sljedeća prava i obaveze:

- da biraju i budu birani u organe Udruženja,
- da aktivno učestvuju u ostvarivanju ciljeva Udruženja,
- da budu redovno i blagovremeno obavještavani o aktivnostima Udruženja,
- da sarađuju s ostalim članovima Udruženja,
- da čuvaju i podižu ugled Udruženja,
- da čuvaju materijalna i intelektualna dobra Udruženja te da izvršavaju preuzete obaveze,
- da ostvaruju druga prava i dužnosti utvrđena Statutom i općim aktima Udruženja.

### **Član 10.**

Članstvo u Udruženju prestaje:

- istupanjem člana,
- isključenjem člana,
- smrću člana,
- ako neopravdano ne plaća članarinu najmanje dvije godine uzastopno.

### **Član 11.**

Svaki član Udruženja može istupiti iz Udruženja, na osnovu pisane izjave o istupanju, koju dostavlja Upravnom odboru Udruženja.

Kao dan prestanka članstva smatraće se datum prijema izjave o istupanju.

### **Član 12.**

Član Udruženja koji grubo krši Statut Udruženja, ne izvršava svoje obaveze prema Udruženju, svojim postupcima nanosi štetu Udruženju ili narušava ugled Udruženja, upotrebljava materijalna ili intelektualna dobra Udruženja bez dozvole nadležnih organa ili se utvrdi da najmanje dvije godine ne plaća članarinu, može biti isključen iz Udruženja.

Prije donošenja odluke o isključenju, član Udruženja mora biti obaviješten o prijedlogu za isključenje, kao i razlozima zbog kojih se predlaže isključenje.

Članu Udruženja se mora ostaviti razuman rok od najmanje mjesec dana za izjašnjenje o pokrenutom prijedlogu za isključenje iz Udruženja.

Odluku o isključenju člana donosi Upravni odbor Udruženja.

Protiv odluke Upravnog odbora Udruženja, u roku od 30 dana, može se izjaviti prigovor Skupštini Udruženja, čija odluka je konačna.

### **Član 13.**

O članovima Udruženja vodi se evidencija. Članovima Udruženja se izdaje članska kartica udruženja.

Izgled, sadržaj i način izdavanja članske iskaznice utvrđuje Upravni odbor posebnom odlukom.

Redovni i pridruženi članovi plaćaju članarinu, dok odluku o načinu plaćanja i visini članarine donosi Upravni odbor Udruženja.

Skupština Udruženja može donijeti opći akt kojim će, u skladu s ovim Statutom, bliže urediti način i postupak stupanja u članstvo i prestanak članstva.

#### **Član 14.**

Udruženje može biti kolektivnim članom i drugih odgovarajućih domaćih i međunarodnih udruženja i organizacija čija djelatnost je saglasna s ciljevima, odnosno djelatnosti Udruženja, o čemu odluku donosi Skupština Udruženja.

Članovi Udruženja individualno, također, mogu biti članovi i drugih odgovarajućih domaćih i međunarodnih udruženja i organizacija.

### **V - ORGANIZACIJA UDRUŽENJA**

#### **Član 15.**

Organi Udruženja su:

- Skupština,
- Upravni odbor,
- Nadzorni odbor,
- Sud časti.
- 

Mandat svih organa Udruženja traje četiri godine.

#### ***Skupština Udruženja***

#### **Član 16.**

Skupština je najviši organ Udruženja.

Sjednice Skupštine održavaju se najmanje jedanput godišnje.

Skupština Udruženja broji najmanje 10 delegata. Kriteriji, način izbora, prava delegiranja i broj predstavnika, odnosno delegata utvrđuju se odlukom Upravnog odbora, u zavisnosti od brojnosti članstva.

#### **Član 17.**

Skupštinu saziva Predsjednik Skupštine Udruženja najmanje 15 dana prije njenog zasjedanja.

Predsjednik Skupštine Udruženja je dužan sazvati Skupštinu kada to zahtijeva najmanje 1/3 delegata Skupštine ili kada to zatraži Upravni odbor Udruženja.

Ako Predsjednik Skupštine ne sazove Skupštinu Udruženja u roku od 30 dana, u slučajevima iz prethodnog stava ovog člana, odluku o sazivanju Skupštine donijet će Upravni odbor Udruženja.

#### **Član 18.**

Skupština Udruženja, kao najviši organ Udruženja, u svojoj nadležnosti donosi:

- Statut Udruženja i njegove izmjene i dopun, Poslovnik o radu Skupštine;
- Daje saglasnosti na pravne radnje poduzete u postupku osnivanja i registrovanja udruženja;
- Imenuje i opoziva: članove upravnog odbora Udruženja; Predsjednika Udruženja, predsjednika Skupštine, članove Nadzornog odbora, članove Suda časti te po potrebi i drugih organa i radnih tijela Udruženja;
- Imenuje i opoziva lica ovlaštena za zastupanje i predstavljanje Udruženja;
- Razmatra i usvaja izvještaje o radu Upravnog odbora i drugih organa Udruženja i komisija koje imenuje Skupština Udruženja;
- Odlučuje o pripajanju, razdvajanju, transformaciji, raspuštanju i prestanku rada, kao i o drugim statusnim promjenama Udruženja;
- Na prijedlog Upravnog odbora donosi odluku o dodjeli priznanja Udruženja;
- Usvaja godišnji finansijski izvještaj i izvještaj o radu Udruženja;
- Odluku o imenovanju počasnih članova Udruženja;
- Odlučuje i o svim drugim pitanjima koja nisu u nadležnosti drugih organa Udruženja.

Skupština razmatra i usvaja žalbe koje joj budu bile podnesene od strane članova Udruženja

#### **Član 19.**

Skupština punovažno odlučuje ako je sjednici prisutno više od polovine delegata.

Skupština donosi odluke većinom glasova prisutnih delegata.

Za odlučivanje o prestanku rada Udruženja potrebna je dvotrećinska većina ukupnog broja delegata.

#### **Član 20.**

Radom Skupštine rukovodi Predsjednik Skupštine koji se bira na period od četiri godine

Predsjednik skupštine:

- stara se o organizovanju rada Skupštine i saziva njene sjednice,
- priprema materijal za sjednice Skupštine,
- predlaže dnevni red sjednice,
- predsjedava sjednicama Skupštine,
- potpisuje akte donesene na Skupštini,
- stara se o izvršavanju odluka, zaključaka i drugih akata Skupštine,
- koordinira rad organa i tijela Skupštine i
- vrši i druge poslove koje mu odredi Skupština Udruženja.

Svoje odluke skupština donosi javnim glasanjem, a samo izuzetno tajnim glasanjem.

#### ***Upravni odbor***

#### **Član 21.**

Upravni odbor je izvršni organ Udruženja i čine ga predsjednik Udruženja i osam članova.

Predsjednika Udruženja i osam članova Upravnog odbora bira Skupština Udruženja.

Kandidata za predsjednika može istaći bilo koji član Skupštine.

Mandat Predsjednika Udruženja i članova Upravnog odbora traje 4 (četiri) godine, sa mogućnošću jednog reizbora.

Sjednice Upravnog odbora zakazuje i njima rukovodi predsjednik Udruženja.

Upravni odbor može donositi odluke ukoliko je prisutna natpolovična većina članova.

Odluka se smatra usvojenom ako je podrži više od polovine članova Upravnog odbora.

Sjednice Upravnog odbora se održavaju najmanje jednom u tri mjeseca.

### **Član 22.**

Predsjednik Udruženja imenuje potpredsjednika iz redova članova Upravnog odbora Udruženja.

Rad predsjednika Udruženja i potpredsjednika Udruženja je volonterski i bez naknada.

Predsjednika u slučaju spriječenosti zamjenjuje potpredsjednik, sa svim njegovim pravima i ovlaštenjima utvrđenim Statutom.

### **Član 23.**

Upravni odbor u svojoj nadležnosti:

- sa predsjednikom Skupštine priprema sjednice Skupštine i predlaže dnevni red,
- priprema Nacrt Statuta i drugih akata koje donosi Skupština,
- provodi politiku, zaključke i druge odluke Skupštine,
- raspolaže imovinom Udruženja,
- donosi Pravilnik o raspodjeli i utrošku finansijskih sredstva kojima raspolaže udruženje
- podnosi Skupštini godišnji izvještaj o svom radu,
- imenuje i razrješava rukovodioce sekcija Udruženja,
- imenuje i razrješava sekretara Udruženja,
- imenuje i razrješava koordinatora za pojedine djelatnosti Udruženja,
- imenuje i razrješava supotpisnika naloga za utrošak sredstava Udruženja,
- donosi poslovnik o svom radu,
- donosi odluku o visini i načinu prikupljanja članarine,
- donosi odluke o troškovima službenih putovanja,
- imenuje lica za raspolaganje sredstvima na žiro računu i računima fondova,
- razmatra programe rada sekcija i koordinatora, te na osnovu toga donosi operativni godišnji program rada Udruženja.
- razmatra godišnji izvještaj o radu i poslovanju sekcija i koordinatora,
- stara se o informiranju članova,
- izvršava i druge zadatke po ovlaštenjima Skupštine i zahtjevima nadležnih organa.

### **Član 24.**

Predsjednik Udruženja predstavlja i zastupa Udruženje i njegove organe, koordinira rad organa Udruženja.

Predsjednik Udruženja može dati pismenu punomoć za zastupanje advokatu ili drugom stručnom licu u postupcima u kojima Udruženje učestvuje kao stranka radi ostvarivanja svojih prava.

Ako je period spriječenosti obavljanja funkcije Predsjednika Udruženja duži od šest mjeseci, onda se saziva vanredna skupština Udruženja i imenuje se lice koje će rukovoditi Udruženjem.

### ***Sekretar udruženja***

#### **Član 25.**

Sekretar udruženja

- pomaže predsjedniku u njegovom radu,
- vodi zapisnike na sjednicama Upravnog odbora
- vodi evidenciju članstva Udruženja,
- vodi i čuva arhivu Udruženja,
- čuva pečat Udruženja,
- obavlja finansijske poslove Udruženja,
- izvještava Upravni odbor o finansijskom poslovanju,
- pomaže u izradi i vrši nadzor nad izradom finansijskih izvještaja i obračuna,
- obavlja i druge poslove koje mu povjeri predsjednik koji su u skladu s odlukama Upravnog odbora i Skupštine.

### ***Nadzorni odbor***

#### **Član 26.**

Nadzorni odbor broji tri člana.

Predsjednika i članove Nadzornog odbora bira Skupština Udruženja na period od četiri godine.

Članovi Nadzornog odbora ne mogu biti istovremeno članovi Upravnog odbora Udruženja.

Nadzorni odbor kontrolira materijalno-finansijsko poslovanje Udruženja, sprovođenje odluka Upravnog odbora Udruženja i o tome informira članstvo i organe Udruženja najmanje jednom godišnje.

U svom radu Nadzorni odbor saraduje sa drugim organima Udruženja.

Nadzorni odbor donosi odluke većinom glasova.

### ***Sud časti***

#### **Član 27.**

Sud časti čine tri člana.



Predsjednika i članove Suda časti bira Skupština Udruženja na period od (4) četiri godine.

Sud časti donosi odluke većinom glasova.

#### **Član 28.**

Sud časti sastaje se po potrebi.

Sud časti nadležan je za postupke kojim se utvrđuje da li je član Udruženja počinio bitnu povredu Statuta ili drugih općih akata Udruženja i za izricanje mjera u slučaju ako je takva povreda izvršena.

#### **Član 29.**

Ako utvrdi da je član Udruženja počinio bitnu povredu Statuta ili drugih općih akata Udruženja, Sud časti može izreći opomenu, javnu opomenu ili predložiti Upravnom odboru isključenje člana iz Udruženja.

#### **Član 30.**

Skupština Udruženja može donijeti opći akt kojim se bliže uređuju pitanja od značaja za način rada Suda časti i ostvarivanja njegovih nadležnosti, u skladu sa ovim Statutom.

### ***Sekcije***

#### **Član 31.**

Udruženje ima sekcije za:

- nauku i visoko obrazovanje,
- srednju školu,
- osnovnu školu,
- za rad sa nadarenim učenicima i studentima,
- za održavanje web stranicu i odnose s javnošću.

U slučaju potrebe Upravni odbor može formirati i druge sekcije.

Djelokrug rada sekcija Udruženja utvrđuje se posebnim pravilnikom kojeg donosi Upravni odbor Udruženja.

### ***Radna tijela***

#### **Član 32.**

Upravni odbor po potrebi obrazuje i povremene komisije i druga svoja radna tijela.

Djelokrug, način rada i sastav komisija i drugih radnih tijela regulira se Poslovníkom o radu Upravnog odbora Udruženja.

### ***Posebni oblici organiziranja***

#### **Član 33.**

Radi uspješnijeg i potpunijeg ostvarivanja ciljeva Udruženja, Udruženje može uspostaviti posebne oblike organiziranja, na prijedlog Upravnog odbora.

## **V - PREDSTAVLJANJE I ZASTUPANJE UDRUŽENJA**

### **Član 34.**

Udruženje predstavlja i zastupa predsjednik Udruženja i predsjednik Skupštine Udruženja.

Mandat imenovanih iz stava (1) ovog člana traje 4 (četiri) godine, sa mogućnošću jednog reizbora.

## **VI - JAVNOST RADA UDRUŽENJA**

### **Član 35.**

Rad Udruženja je javan.

Javnost rada obezbjeđuje se:

- javnim održavanjem sjednica svih organa Udruženja,
- dostavljanjem izvještaja o radu, finansijskom planu, završnih računa i drugih dokumenata organa Udruženja članovima Udruženja,
- obezbjeđivanjem prava delegata da po svim razmotrenim pitanjima javno iznose svoje mišljenje, kritiku i prijedloge za njihovo rješavanje,
- redovnom saradnjom sa sredstvima javnog informiranja,
- kreiranjem i ažuriranjem web stranice Udruženja.

## **VII - FINANSIRANJE I IMOVINA UDRUŽENJA**

### **Član 36.**

Sredstva za finansiranje djelatnosti Udruženja obezbjeđuju se iz:

- članarina,
- dobrovoljni priloz i pokloni fizičkih i pravnih lica,
- donacije, dotacije i sponzorstva,
- sredstva ostavarena učešćem u projektima,
- sredstva prikupljena štampanjem udžbenika, priručnika i drugih didaktičkih materijala, i sl.,
- sredstva prikupljena organizacijom takmičenja, skupova, predavanja, savjetovanja, seminara, radionica, ljetnih i zimskih škola, i sl.,
- sredstva prikupljena iz drugih izvora u skladu sa Zakonom.

### **Član 37.**

Sredstva Udruženja mogu se koristiti samo za ostvarivanje programskih ciljeva i zadataka Udruženja, a na osnovu programa rada Udruženja i utvrđenih finansijskih planova te pozitivnih zakonskih propisa.

### **Član 38.**

Sopstvenim prihodom Udruženje samostalno raspolaže preko svog žiro računa na način utvrđen odlukama Upravnog odbora Udruženja u skladu sa zakonom.

Udruženje ima otvoren transakcijski račun kod jedne od komercijalnih banaka.

Za obaveze nastale u radu Udruženja i njegovih organa, odgovara Udruženje.

#### **Član 39.**

Naloga za utrošak sredstava Udruženja potpisuje predsjednik Udruženja, odnosno potpresjednik u slučaju spriječenosti predsjednika Udruženja, uz supotpis lica koje imenuje Upravni odbor Udruženja u skladu sa članom 23. ovog Statuta.

#### **Član 40.**

Udruženje može imati u vlasništvu nepokretnu i pokretnu imovinu.

Imovinom u vlasništvu Udruženja upravlja Upravni odbor.

#### **Član 41.**

Upravni odbor donosi na kraju kalendarske godine Izvještaj o radu Udruženja i finansijski izvještaj i isti prezentira skupštini na usvajanje. Izvještaji se smatraju usvojenim kada se za njih izjasni (1/2) prisutnih delegata na Skupštini Udruženja

Ukoliko se isti ne usvoji vratit će se Upravnom odboru na doradu i prezentovat će se na narednoj sjednici Skupštine.

### **VIII - SARADNJA SA DRUGIM UDRUŽENJIMA, ORGANIZACIJAMA I ORGANIMA**

#### **Član 42.**

Udruženje u ostvarivanju programskih ciljeva saraduje sa organizacijama koje imaju iste ili slične ciljeve, državnim, entitetskim, kantonalnim i drugim organima, pedagoškim zavodima, školama, fakultetima, univerzitetima, te odgovarajućim naučnim, stručnim i privrednim subjektima.

Udruženje, u okviru svojih prava i dužnosti, saraduje i razvija odnose sa sličnim organizacijama u drugim državama u skladu sa Ustavom, zakonom i međunarodnim ugovorima.

### **IX- PRIPAJANJE, RAZDVAJANJE, TRANSFORMACIJA I PRESTANAK RADA UDRUŽENJA**

#### **Član 43.**

Udruženju se može pripojiti drugo udruženje s istim ili sličnim programskim ciljevima.

Udruženje se može razdvojiti na dva ili više udruženja.

Udruženje se može transformirati u Udruženje od javnog interesa.

#### **Član 44.**

Odluku o pripajanju, razdvajanju ili transformaciji donosi Skupština Udruženja na prijedlog Upravnog Odbora.

Odlukom iz prethodnog stava se regulira naročito:

- naziv udruženja koje se Udruženju pripaja, odnosno naziv udruženja koja nastaju razdvajanjem ili naziv Udruženja nakon transformacije, kao i sjedište i adresa,
- podjela imovine, prava i obaveza,
- ciljevi Udruženja nakon pripajanja, razdvajanja ili transformacije,
- imena osoba ovlaštenih za obavljanje poslova u podnošenju zahtjeva za upis u registar izvršene transformacije Udruženja.

#### **Član 45.**

Odluka iz člana 43. Statuta smatra se usvojenom kada je na sjednici Skupštine prihvati dvije trećine ukupnog broja delegata.

#### **Član 46.**

Udruženje može prestati sa radom dobrovoljno ili po sili Zakona.

Udruženje prestaje sa radom dobrovoljno, ako Skupština dvotrećinskom većinom ukupnog broja delegata donese odluku o raspuštanju Udruženja.

Odlukom iz prethodnog stava regulira se postupak za raspolaganje imovinom i drugim sredstvima u slučaju raspuštanja ili prestanka rada Udruženja.

Udruženje prestaje da postoji ispisom iz Registra udruženja.

### **X – POSTUPAK ZA DONOŠENJE STATUTA, IZMJENA I DOPUNA STATUTA**

#### **Član 47.**

Kada se utvrdi da postoje opravdani razlozi, može se podnijeti zahtjev za donošenje novog Statuta ili izmjene i dopune postojećeg Statuta

Inicijativu mogu podnijeti:

- 1/3 delegata Skupštine Udruženja
- Upravni odbor Udruženja
- Nadzorni odbor Udruženja
- 

Inicijativa se dostavlja Predsjedniku Skupštine koji istu prezentira na prvoj sjednici Skupštine, a ako je opravdana, dostavlja Predsjedniku Udruženja radi izrade prijedloga Statuta ili prijedloga izmjena i dopuna Statuta.

Utvrđeni prijedlog Upravni Odbor dostavlja Skupštini Udruženja na usvajanje.

Prijedlozi su usvojeni ako je za njih glasalo najmanje (2/3) prisutnih delegate na Skupštini Udruženja

## **XI - PRELAZNE I ZAVRŠNE ODREDBE**

### **Član 48.**

Tumačenje odredaba ovog statuta daje Upravni odbor Udruženja.

### **Član 49.**

Ovaj Statut stupa na snagu danom usvajanja na Osnivačkoj skupštini Udruženja, a primjenjivat će se od dana upisa u registar kod nadležnog Ministarstva pravde i uprave Kantona Sarajevo.

Sarajevo, 14.01.2016.g.  
Broj:02/16

**Predsjednik Osnivačke skupštine**

---

Mr. Zenan Šabanac